

Newspaper	Berita Harian
Date	28/2/2011



NAJIB bersama penerima Anugerah Tokoh Alumni 2011 dari kiri, Datuk Ahmad Said; Profesor Datuk Dr Khairil Annas Jusoh, Khairul Anwar, Dr Zambry; Presiden Alumni UIAM, Khalek Awang, Dr Mahathir; dan Presiden UIAM, Tan Sri Mohd Sidek Hassan di KLCC, Kuala Lumpur.

Najib seru alumni IPTA bantu universiti

KUALA LUMPUR: Datuk Seri Najib Razak menyeru setiap alumni di institut pengajian tinggi awam (IPTA) memainkan peranan penting dalam memberi sumbangan bermakna kepada universiti masing-masing dan juga pembangunan negara secara keseluruhannya.

"Jika tidak dari segi sumbangan kewangan yang dapat dihulurkan kepada universiti, kemungkinan mereka (alumni) boleh membiayai pengajian beberapa pelajar di peringkat kursus Doktor Falsafah (PhD) seperti dilakukan oleh Alumni Universiti Islam Antarabangsa Malaysia (UIAM).

"Alumni UIAM akan membiayai tiga calon PhD, saya rasa ini adalah satu permulaan yang baik..., jika kita

melihat universiti terkemuka di peringkat dunia mendapat sokongan padu daripada alumni masing-masing sehinggakan sebahagian besar dana universiti disumbangkan oleh alumninya.

"Kita belum sampai peringkat itu lagi tetapi apabila kita melihat soal pembiayaan universiti tempatan sudah tentu kerajaan membiayai lebih 90 peratus kos sesuatu universiti tempatan itu.

"Barang kali soal sama ada mampu kita boleh secara berterusan melakukan perkara ini akan menjadi satu persoalan yang amat mencabar kepada kita semua," katanya.

Perdana Menteri berkata demikian ketika berucap pada Majlis Bersama Pemimpin sempena Deriftasiswa Alumni UIAM di sini malam

tadi turut hadir isteri beliau, Datin Seri Rosmah Mansor, Menteri Pengajian Tinggi, Datuk Seri Mohamed Khalid Nordin dan Ketua Setiausaha Negara, Tan Sri Mohd Sidek Hassan yang juga Presiden UIAM.

Pada majlis itu, seramai sembilan bekas graduan UIAM menerima Anugerah Tokoh Alumni UIAM termasuk Menteri Besar Perak, Datuk Seri Dr Zambry Abdul Kadir, Ketua Polis Negara (KPN), Tan Sri Ismail Omar dan Pengerusi Khairul Group of Associates, Datuk Khairul Anwar Rahmat.

Perdana Menteri turut menyampaikan Anugerah Khas Alumni UIAM kepada bekas Perdana Menteri, Tun Dr Mahathir Mohamad yang juga pengasas UIAM.